



Ramah mesra alumni Sarjana Kejuruteraan Kimia dengan Keusahawanan

Buat julung kalinya Majlis Makan Malam bersama alumni Sarjana Kejuruteraan Kimia (MKK) dengan Keusahawanan (MKK) telah diadakan di Hotel MS Garden, Kuantan pada 8 Mei 2016 yang lalu anjuran Fakulti Kejuruteraan Kimia & Sumber Asli (FKKSA) dengan kerjasama Unit Alumni, Jabatan Hal Ehwal Pelajar (JHEPA).

Majlis diserikan dengan kehadiran Timbalan Naib Canselor (Hal Ehwal Pelajar & Alumni), Profesor Dato' Dr. Yuserrie Zainuddin. Hadir sama Timbalan Naib Canselor (Akademik & Antarabangsa), Profesor Dato' Dr. Rosli Mohd Yunus, Pengarah Pusat Nadir Bumi, Profesor Dato' Dr. Ir. Badhrulhisham Abd. Aziz dan Dekan FKKSA, Zulkafli Hassan.

Dalam ucapannya, Profesor Dato' Dr. Yuserrie melahirkan perasaan gembira dengan perkembangan program MKK ini yang bermula sejak tahun 2011.

“Dengan hanya sembilan orang pelajar yang mendaftar pada awalnya kini seramai 53 orang pelajar telah bergraduasi. Para alumni perlu mengekalkan hubungan baik dengan pihak UMP bagi membolehkan pertukaran idea dan perkongsian ilmu atau mungkin sebagai salah satu rangkaian perniagaan,” katanya.

Sementara itu, Zulkafli berkata, kebanyakan universiti terkemuka dan ternama dunia sentiasa memberikan penekanan yang kuat kepada peranan alumni bagi membantu menjayakan agenda pembangunan universiti.

“Universiti amat berharap dapat membina rangkaian alumni yang kuat yang mampu menjadi sumber kekuatan sesama mereka dan sumber kemahiran dalam pelbagai aspek kepada universiti.

“Alumni akan terus mencipta kejayaan dalam karier masing-masing dan menjadi

kebanggaan universiti serta dapat membantu pelajar hari ini untuk menimba pengalaman dari mereka,” katanya.

Alumni UMP, Yuniza Mohamed melahirkan perasaan gembira dengan penganjuran program seperti ini bagi beramah-mesra dengan rakan-rakan lama di samping membentuk jalinan dan rangkaian di antara para alumni dan pihak UMP.

Beliau mengharapkan rakan-rakan alumni lain dapat terus memberikan sumbangan kepada masyarakat sesuai dengan hasrat UMP dalam memasyarakatkan teknologi.

Dalam masa yang sama, pertemuan ini juga sebagai medium untuk menilai keberkesanan program MKK melalui borang kaji-selidik yang diedarkan di samping mengadakan perancangan dalam mengukuhkan hubungan baik dengan universiti.